

四庫全書

史部

欽定四庫全書

五代會要卷二十五

宋 王溥 撰

幕府

後唐同光二年八月八日中書門下奏諸道除節度使
及兩使判官除受外職其餘職員并軍事判官伏以翹
車著詠戈帛垂文式重弓旌以光罇俎由是副知己之
薦成接士之榮必當備悉行藏習知才行允奉幕中之

畫以稱席上之珍爰自偽梁頗乖斯義皆從除授以佐
藩宣因緣多事之秋慮爽得人之選將期推擇式示更
張今後諸道除節度副使判官兩使除授外其餘職員
并諸州軍事判官等並任本道本州各當辟舉其軍事
判官仍不在奏官之限

天成元年八月十一日勅諸道開置幕府皆有舊規奏
薦官寮亦著前式苟或隳紊難正澆訛從前諸道奏請
判官若遇移鎮便合隨去若無除授亦隨府罷近年流

例有異從來使府雖過除移判官元守舊職今後若朝廷除授者即不繫使府除移如是自請充職者便須隨去如遇府罷其職亦罷又往例藩鎮帶平章事奏請判官殿中已上許奏紫不帶平章事亦同帶平章事例處分如是防禦團練使奏請判官自員外郎已下不在奏緋之限其所奏判官州縣官並須將前任告赤隨奏到京若是未曾有官須假職銜者亦須奏狀內言並未有官如是節度觀察留後及權知軍州事並不在奏請判

官之限如刺史要奏州縣官並須申本道請發表章不在自奏之限今日諸道奏請從事本無官序要結虛銜不計職位高卑多是兼請朱紫不唯紊亂實啟倖求深蠹異章須行釐革宜令諸道州府仍下管內知州准勅命處分 四年六月勅諸道節度行軍司馬名位雖高或帥臣不在其軍州事節度副使權知

長興元年五月十六日勅去年相次有諸道前資掌書記已下賓從到京求官人數極多或自述行止或得替

節度使論薦兼有已于郊天行事者即日朝班中無員
闕安排前件官等皆隨府罷職相次到京當奏辟之時
慎選盡由門館及替閒之後安排須告朝廷若不特議
區分即恐久令淹滯宜令于諸道掌書記已下據有員
闕處各除授一員仍自此凡是朝官及諸州府判官得
替一周年後得求官擢才特勅不在此限 其年十二月
十九日大常丞孔知邵奏諸道行軍副使兩使判官及
防禦團練軍事判官並請依考限欲滿一月前本處聞

奏朝廷除替從之兼上佐令錄判司主簿亦准此指揮
或有丁憂及不赴任因事停官身死並具月日申如不
依指揮罪本處官判官 二年二月中書門下奏准天
成四年六月二十日勅刺史准舊例以三年為限其少
尹上佐官以二十五月為限府縣官准長定格以三十
月為限其行軍副使兩使判官已下賓僚及防禦團練
副使判官推官軍事判官並宜以三十箇月為限如是
隨府不在此限 其年十二月勅今後兩使判官罷任

後一年外與比擬書記支使防禦團練判官等二年外
推巡防禦團練推官軍事判官等並三年與比擬仍每
遇除授量與改轉官資或階勳職次若文學智術超羣
倫者不拘月日之限才器卑陋階緣得事者即于州縣
官中比擬若州縣官中有文學雄奧識畧優深者亦於
班行諸道判官中比擬任使

清泰二年七月中書門下奏自今年三月後諸州刺史
奏軍判官九人行之有碍新勅慮在外未知勅軍判官

宜令本州刺史自選擇舉奏且初除本職未得與官或與刺史連任相隨顯有勞能許本州刺史以聞量事獎擢仍不得枉有論薦其三月後九人且與施行

晉天福二年二月勅前任諸道行軍副使等今後替罷一年後方得赴闕其先替在京者宜令中書門下據見有闕員除授仍勅諸道知

四年七月勅今後防禦團練刺史所奏從事無名官者不在申薦漢乾祐元年正月勅其諸道行軍副使兩使判官今後

不得行奏薦委中書門下選帶使相節度使許奏節度掌書記觀察支使節度推官不帶使相節度使只許奏節度掌書記節推官其防禦團練判官等聽奏薦仍須精擇才能其奏薦州縣官帶使相許薦三人不帶使相許薦二人防禦團練刺史許薦一人仍舉唐朝晉朝勅永為規則

周廣順元年三月勅副留守節度副使行軍兩京少尹留守判官兩使判官共許差定當直人力不得過十五

人諸府少尹掌書記支使防禦團練副使不得過一十人節度推官防禦團練軍事判官不得過七人並取本廳舊當直人力充若數少不及新定數目祇仰舊人數差定仍令逐處係帳收管此外如不遵條制額外占差人戶本官當行朝典

顯德二年六月詔兩京諸道州府留守判官兩使判官少尹防禦團練軍事判官今後並不得奏薦如隨郡已歷前件官職任者不在此限其防禦團練刺史各置推

官一員

租稅

後唐同光三年二月勅魏府小菽豆稅每畝減放三升
城內店宅園圃比來無稅頃因偽命遂有配徵後來以
所徵物色添助軍裝衣賜將令通濟宜示矜蠲今據緊
慢去處于見輸稅絲上每兩作三等酌量納錢貴與充
本迴圖收市軍裝衣賜其絲仍與除放 其年閏十二
月吏部尚書李琪上疏曰臣聞古人有言穀者人之司

命地者穀之所生人者君之所理有其穀則國力備定其地則人食足察其人則徭役均知此三者為國之急務也軒黃已前不可詳記自堯堙洪水禹作司空于是九等之田收什一之稅其時戶口一千三百餘萬定墾田約九百二十萬頃為太平之盛及殷革夏命重立田制畝稅田十畝種公田一畝水旱同之亦什一之義也洎周室立井田之法大約百里之國提封萬井出車千乘戎馬四千匹畿內兵車萬乘馬四萬匹如以田法論

之亦什一之制也故當成康之世比堯舜之朝戶口更增二丁餘萬非他術也蓋三代之前皆量入以為出計農以為軍雖逢水旱之災而有凶荒之備降及秦漢重稅工商急關市之征倍舟車之算人口既以減耗古制猶復兼行按此時戶口尚有千二百餘萬墾田亦一千八百萬餘頃至乎三國並興兩晉之後則農夫少于軍衆戰馬多于畊牛供軍須奪于農糧秣馬必侵于牛草於是天下戶口止有二百四千餘萬洎隋文之代與漢

比崇及煬帝之年又三分去二唐太宗文皇帝以四方
初定百姓未豐延訪羣臣各陳所見唯魏徵獨勸文皇
帝力行王道由是輕徭薄賦不奪農時進賢良悅忠直
天下斗粟直兩錢自正觀至于開元將及九百萬戶五
千二百萬口墾田一千四百萬頃比之近古又多增加
是知救人瘼者以重斂為病源料兵食者以惠能為軍
政仲尼云百姓足君孰與不足臣之此言是魏徵所以
勸文皇也伏維深留宸鑒如以六軍方闕未可輕徭兩

稅之餘猶須重斂則但不以折納為事一切以本色輸
官又不以紐配為名止以正稅加納天下幸甚勅本朝徵科
唯配有兩稅至於折納彼不施為宜依李琪所論應逐
稅合納錢物斛斗鹽錢等宜令租庸司指揮並准元徵
本色輸納不得更改若合有移改即須具事由聞奏

天成元年四月赦節文應納夏秋稅子先有省耗每斗
一升今後止納正稅數不量省耗 四年五月五日戶

部奏三京鄴都諸道州府逐年所徵夏秋稅租兼鹽麴

折徵諸般錢穀等起徵餘流如後四十七處節候常早
大小麥麴麥豌豆五月十五日起徵八月一日起納足正
稅匹帛錢鞋地頭權麴蠶鹽及諸色折科六月五日起
至八月二十日納足河南府華州耀陝絳鄭孟懷陳齊
隸延充沂涂宿汝申安滑濮澶襄均房雍許邢洺磁唐
隋郢蔡同鄆魏汴潁復鄆宋毫蒲等州 二十三處節
候差晚隨本處與立兩等期限辛三處州郡未見 一十六處較
晚大小麥麴麥豌豆六月一日起徵至八月十五日納

足正稅匹帛錢鞋地頭權麴蠶鹽及諸色折科六月十
一日起徵至八月二十五日納足幽定鎮滄晉隰慈密
青鄧淄萊邠寧慶衍等七處節候尤晚大小麥豌豆六
月十日起徵至九月納足正稅匹帛錢鞋權麴錢等六
月二十日起徵至九月納足并潞澤應威塞軍大同
軍振武軍等其月勅百姓今年夏苗委人戶自通供手
狀具頃畝多少五家為保委無隱漏攢連狀本州具狀
送省州縣不得迭差人檢括如人戶隱欺許令陳告其

田倍令并徵

長興二年六月勅委諸道觀察使屬縣于每村定有力人戶充村長與村人議有力人戶出剩田苗補貧下不造頃苗自肯者即具狀徵收有力者即排段檢括自今年起為定額有經災沴及逐年逋處不在此限 三年十二月三司奏請諸道上供稅物充兵士衣賜不足其天下所納斛斗及錢除支贍外請依時估折納綾羅絹帛從之

晉天福四年正月勅應諸道節度刺史不得擅加賦役
及於縣邑別立監徵所納田租委人戶自量自槩

周顯德三年十月宣三司指揮諸道州府今後夏稅以
六月一日起徵秋稅至十月一日止徵永為定置 五
年七月詔曰朕以寰宇雖安烝民未泰當一夜觀書之
際校前賢阜俗之方近覽元稹長慶集見在同州時所
上均田表較當時之利病曲盡其情俾一境之生靈咸
受其賜傳於方冊可得披尋因令製素成圖直書其事

庶王公觀覽觸目警心利國便民無亂條制背經合道盡繫變通但要適宜所冀濟務繫乃勛舊共庇黎元今

賜元稹所奏均田圖一面至可領也

是時上將均定天下民租故先以均

田圖遍賜諸侯

其年十月賜諸道均田詔曰朕以干戈既弭

寰海漸寧言念地征罕臻執極須議並行均定所冀永適重輕卿受任方隅深究治本必能副寡昧平分之意察鄉閭致病之源明示條章用分寄任竚令集事允屬推公今差使臣往彼檢括餘從別勅

乃命左散騎常侍艾頴等三十

四人下諸州
檢定民租

雜錄

後唐長興元年三月十三日勅天下州府受納稗草每
束納錢一文足一百束納拘子四莖充積年供使棗鐵
一莖充稗場院其草并柴蒿一束納錢一文其納絹布
綾羅每疋納錢一十二文足絲綿納綿麻皮等每一十
兩納耗半兩鞋每量納錢一文足見錢每貫納七文足
省庫收納上件前物元條流見錢每貫納二文足絲綿

紬子每一百兩納耗一兩其諸色匹段並無加耗 二年閏五月勅今後諸州店所納稗草每二十束別加耗一束充場司耗折其每來上舊納盤纏錢一文仰官典同共易豎一一分明上歷至納遣了絕已來公使不輒將出外

周廣順元年三月二十八日勅諸道州府牛皮今後犯一張本犯人徒三年刺配重處色役本管節級所由杖九十兩張以上本人處死本管節級所由徒二年半刺配

重處色役告事人賞錢五十千其人戶有牛死者其本
戶告報本地方所由節級鄰保人仰當日內同檢驗過
令本主盡時剥皮及申報本處官吏限十日內須送納
畢其筋骨不得隱落 二年十二月勅應天下人所納
牛皮今將逐年所納數三分內減收三分其一分子人
戶苗畝上配定每秋夏苗共十頃納連角牛皮一張其
黃牛納乾筋四兩水牛半斤犢牝皮不在納限其皮人
戶自詣本州送納所司不得邀難所有牛馬驢騾皮筋

骨今後官中更不禁斷並許私家共便買賣祇不得將至敵疆興販仍仰關津界首仔細覺察捕捉所犯人必加深罪其州縣先置巡檢牛皮節級及朝廷先降條法一切停廢

顯德三年五月勅應天下今後公私織造凡絹帛紬布綾羅錦綺及諸色匹帛其幅尺斤兩並須合向來制度不得輕弱假偽罔冒取價如有物色已上等限一百日內並須破貨了絕如限外敢有違犯織造貨買者仰所

在節級所由撿捉送官 其年十月勅舊制織絕絹布綾羅錦綺紗縠等幅濶二尺起來年後公私織造並須及二尺五分不得夾帶粉藥宜令諸道州府嚴切指揮來年所納官絹每疋須及一十二兩河北諸州并萊登沂密州須及一十二兩絕紬止要夾密停勻不定斤兩絕紬絹長依舊四十二尺 四年二月六日勅節文諸道州府所管屬縣每年秋夏徵科了畢後多是却追縣典上州會來文鈔因茲科配斂掠宜令今後秋夏徵科

了足日仰本州府但取倉場庫務納欠文鈔如無異同不在更追官典諸道州府管內縣內鎮每有追攝公事自前多差衙前使院職員及散從步奏官今後如是常程追攝公事祇令府望知後承受遞送不得更差專人若要切公事及軍期不在此限 五年六月四日勅諸道州府應有商賈興販牛畜不計黃水牛凡經過處並不得抽稅如是貨賣處祇仰據賣價每一千抽稅錢二十不得別有邀難

團貌

周顯德五年十月詔諸道州府令團并鄉村大率以百戶為一團選三大戶為耆長凡民家之有姦盜者三大戶察之民田之有耗登者三大戶均之仍每及三載

帳籍

梁開平三年三月尚書戶部奏請詔天下州府准舊章申送戶口帳籍從之

晉天福九年八月勅天下諸州各以係省錢穀秋夏徵

科為帳籍一季一奏一年賦稅及限其藩侯郡守吏委在任一年次年又不逋欠聽三周年為滿三年皆辦別議遷陟

逃戶

後唐天成三年十二月十日殿中監李延範奏請指揮諸道州府每逃戶歸業後委州司各與公憑二年内放免兩稅差科如有違許州論詳勘責若州縣官總得五百戶以上元等第獎酬從之

長興三年七月二十七日勅應諸處凡有今年為經水
滂逃戶在園屋舍桑棗一物已上並可指揮州縣散下
鄉村委逐村節級鄰保人分明文簿各管現在不得輒令
毀拆房舍斬伐樹木及散失動使什物等俟本戶歸業
日却依元數責令交付訖具無欠少罪結狀申本州縣
如元數內稱有物欠少許歸業戶陳狀訴論所犯節級
并鄉鄰保人等並科違勅之罪仍勒倍償或至來年春
入務後有逃戶未歸者其桑土即許鄰保人請佃供輸

租稅種後本主歸來亦准上指揮至秋收後還之

周顯德二年五月二十五日勅應自前及今後有逃戶莊田許人請射承佃供納租稅如三周年後本戶歸來業者其桑土不論荒熟并莊田交還一分應已上承佃戶如是自出力別蓋造到屋舍及栽種到樹木園圃並不在交還之限如五周年外歸業者莊田除本戶墳塋外不在交付如有荒廢桑土承佃戶自來無力佃蒔祇仰交割與歸業人戶佃蒔一近北諸州自契丹離亂

鄉村人戶多被邊軍打掠向北近來多有百姓自番界
回來其莊田已被別戶請射無處歸託今後如有五周
年內其本主還來識認不以桑土荒熟并莊園三分中
交還二分十周年內來者交還一半十五周年內來者三
分中交還一分應上項承佃戶如是自出力別蓋造到
屋舍及栽種到樹木園圃並不在給還之限如十五周
年外歸業者其莊田除本戶墳塋外不在給還如有荒
廢桑土承佃戶自來無力佃蒔祇仰交割與歸業人戶佃

時一應有坐罪家破逃人戶其戶下物業並許別戶陳
告請射承佃供納租稅充為承業不限年歲不在論認
之限所有本戶及鄉村節級重行斷決 一諸州應有
冒佃逃戶物業不納租稅者其本戶歸業之時不計年
限並許論認仰本縣立差人檢勘交割與本戶為主如
本戶不來歸業亦許別戶請射為主所有冒佃人戶及
本縣節級重行科斷如冒佃人戶自來陳首承認租稅
者特與免罪 一顯德二年正月二十五日已前應有

逃戶拋下莊田自來全段無人承佃曾經省司指揮開
闢租稅者宜令本州縣招攜人戶歸業及許別戶請射
為主與免一年差稅色役至第二年已後據見在桑木
及租蒔到見苗詣實供通輸納租稅

雜錄

後天成元

一作二

年十二月三日勅率土黎甿並輸王稅逐

年上計祇在春時深虞所在之方或有無知之人不自
增修產業輒便攪擾鄉鄰既撓公門須嚴定制宜自今

後凡關論認桑土二月後州縣不得受狀十月後間方
許論對仍令逐處官吏准前後條格據理斷割

周顯德四年七月勅起今後應有人論訴物業婚姻自
十一月一日後許承狀至二月三十日權停自二月三
十日已前如有陳訴至權停日公事未了絕者仰本處
州縣亦與盡理勘逐須見定奪了絕其本處官吏如敢
違慢並當重責其三月一日後至十月三十日前如有
婚田詞訟者州縣不得與理若是交相侵奪情理妨害

不可停滯者不拘此例

奴婢

後唐同光二年二月赦應有百姓婦女俘掠他處為婢妾者不得占留一任骨肉識認

天成元年十月三日勅京城諸道若不是正口不得私書契券輒使良人

周顯德五年七月新定刑統該誘良口勾引逃亡奴婢與貨賣所有資裝者其私誘勾引之人伏請處死良口

奴婢並准律格處分如是居停主人元不是勾引之人請行重斷其或分受贓物至三疋已上者處死如有將良口于番界貨賣者居停主人明知賣與番界不告官者亦請處死

道路

後唐天成三年二月興元府奏修斜谷開道二千八百餘里四月洋州奏重開入蜀舊路比今官路近二十五里五月夔州奏開新路至房州

長興二年八月勅准儀制令道路街巷賤避貴少避長輕
避重去避來宜令三京諸道州府各遍下縣鎮准舊儀制
于道路分明刻牌子要會坊門及諸橋柱曉示路人委
本界所由官司共相巡察有違犯者科違勅之罪 四
年正月西京留守王思同進擬開駱谷路圖上指山險
謂侍臣曰如此之險何以開通左右奏曰據興元關內
兵戎交番及轉餉大散修開斜谷路迂迴校五百里如
從駱谷自雍京直抵興元糧成稍便然此路險阻尤甚

以此竭力開通將來霖雨亦頗修葺上佹俛從其奏竟
無成功而止

五代會要卷二十五

欽定四庫全書

五代會要卷二十六

宋 王溥 撰

街巷

後唐同光二年八月初在京應有空閒地任諸色人請射蓋造藩方侯伯內外臣寮於京邑之中無安居之所亦可請射各自修營其空閒有主之地仍限半年本主須自修蓋如過限不見屋宇亦許他人占射其月勅諸

道觀察防禦團練等使刺史出司土宇入覲朝廷將壯
宸居須崇甲第宜於洛京修宅一區

長興二年六月八日據左右軍巡使奏諸廂界內多有
人戶侵占官街及坊曲內田地蓋造屋舍又不經官申
判押憑據廂界不敢懸便止絕竊恐久後別有人戶更
于街坊占射轉有侵占不惟窄狹兼恐久後別有人戶
及至人戶爭競近日人戶係稅田地多被軍人百姓作
空閒田地便立封疆修築牆壁占射又無判押憑據及

本主或有文契典賣無云占射年深或有稅額及無稅
空閒攔悵不令修蓋以此致有爭競廂界難以止絕者
其在京諸坊曲應有空閒田地先降勅命許人戶請射
蓋造及見種蒔公私田地如是本主自有力便令蓋造
舍屋若無力即許人請射修蓋自後相次諸色人陳狀
委河南府勘逐如實是閒田不侵占官街然後指揮肇
畫交付今所稱諸色人侵占街坊於見有主稅地內占
射蓋造必慮有妨車牛過往及恐百姓互爭有論須定

規繩各令禦守京城應大街內有人戶見蓋造得屋宇外此後並不得更有蓋造其諸坊巷道兩邊常須通得牛車如有小街巷亦須通得車馬來往此外並不得輒有侵占應諸街坊通車牛外即日或有越衆迴然出頭牽蓋舍屋棚閣等并須盡時毀拆仍據樽截外具留街道闊狹尺寸一一分析申奏此後或更敢侵占不計多少宜委地分官司量罪科斷其街道內除水渠外不得穿掘取土若已有穿掘各勒逐地分人戶速速填平京

城內諸坊曲除見定園林池亭外其餘種蒔及充菜園并空閒田地除本主量力自要修造外並許人收買見定已有居人諸坊曲內有空閒田地及種蒔并菜園等如是臨街堪蓋店處田地每一間破明間七椽其每間地價宜委河南府估價收買除堪蓋店外其餘若是連店田地每畝宜定價錢七千更以次五千其未曾有蓋造處宜令御史臺兩街使河南府依已前街坊田地分界畫出大街及逐坊界分各立坊門兼掛名額先定街

巷闊狹尺丈後其坊內空閒及見種田苗并充菜園等
田地亦據本主自要量力修蓋外並許諸色人收買修
蓋舍屋地宅如是臨街堪蓋店處田地每一間破明間
七椽其每間地價亦委河南府估價准前收買除堪蓋
店外其餘連店田地每畝宜定價錢七千以次近外每
畝五千更以次三千未有人買處且勒仍舊遠僻處或
欲置菜園任取穩便兼應本主所留諸色人置到田地
等並限三個月內修築蓋造須見次第仍不得兩處收

買田地其地祇許修造宅院并其間小小栽植竹木外
不得廣作園囿及種植田苗仍令御史臺常加覺察如
有故違仰具姓名申奏當行嚴斷其所置田地如是本
主種田苗及見菜園候收刈及冬藏畢方許交割據交
割日限後修蓋其已買地內所有苗稅等宜令據畝數
出除其所買地除本主自要修蓋外有合賣數目如妄
記形勢輒有逗留分外邀求有心占愾者許買地人經
臺論訴勘逐不虛所犯之人當行重斷其地仍准價例

盡時交與所買之人其所買賣田地仍令御史臺委本處巡按御史旋給與公憑仍免稅契右宜令御史臺兩街使河南府專切依次第擘畫曉示或有利便亦可臨時詳奪奏聞其月勅京城坊市人戶菜園許人收買竊慮本主占押年多以鬻蔬為業固多貧窶豈辦蓋造恐資豪滑轉傷貧民若是有力人戶及形勢職掌曹司等已有居地外於別處及連宅買菜園令人主把或典賃於人並准前勅價例如貧窮之人買得菜園自賣菜

供衣食者即等第特添價直仍賣者不得多恡田土買者不得廣占田地各量事力須議修營

周顯德三年六月詔輦轂之下謂之浩穰萬國駿奔四方繁會此地比為藩翰近建京都人物喧闐閭巷隘陋雨雪則有泥濘之患風旱則多火燭之憂每遇炎熱相蒸易生疾疹近者開廣都邑展引街坊雖然暫勞終成大利朕自淮上回及京師周覽康衢更思通濟千門萬戶得遂安逸之心盛暑隆冬倍減寒燠之苦其京城內街道闊

五十步者許兩邊人戶各於五步內取便種樹掘井修蓋涼棚其三十步已下至二十五步者各與三步其次有差

橋梁

晉天福六年二月置浮梁橋於得勝渡

關

梁開平元年七月勅建國遷都俾新其制況山河之險表裏為防今二京俱在關東為內仍以潼關隸陝州

其月勅改武牢關為軍仍置虎牢關軍使

市

後唐天成元年十一月二十一日勅在京市肆凡是絲絹斛斗柴炭一物已上皆有牙人百姓將財物貨賣致時物騰貴百姓困窮今後宜令河南府一切禁斷如是產業人口畜乘須憑牙保此外並不得輒置仍委兩軍巡使覺察切加捉獲如違並當嚴斷

周廣順二年十二月開封府奏商賈及諸色人訴稱被

牙人店主引領百姓賒買財貨違限不還其亦有將物去後便與牙人設計公然隱沒及莊宅牙人等亦多與有物業人通情重叠將產宅立契典當或虛指別人產業及浮造屋舍偽稱祖父所置更有卑幼骨肉不問家長衷私典賣及將倚當取債或是骨肉物業自己不合有分倚強凌弱公行典賣牙人錢主通同蒙昧致有爭訟起今後欲乞明降指揮應有諸色牙人店主引致買賣並須錢物交相分付或還錢未足祇仰牙行人店主

明立期限勒定文字遞相委保如數內有人前却及違
限別無抵當便仰連署契人同力填還如諸色人牙行
人內有貧窮無信行者恐已後悞累即却衆扶集出如
是客旅自與人商量交易其店主人牙行人並不得邀
難遮占稱須依行店事例引致如有此色人亦加深罪
其有典質倚當物業仰官牙人業主及四隣同署文契
委不是曾將物業印稅之時於稅務內納契白一本務
司點檢須有官牙人鄰人押署處及委不是重疊倚當

方得與印如有故違關連人押行科斷仍徵還錢物如
業主別無抵當仰同署契行保鄰人物分代納如是卑
幼不問家長便將物業典賣倚當或雖是骨肉物色自
已不合有分輒敢契賣倚當者所犯人重行科斷其牙
人錢主並當深罪所有物業請准格律指揮如有典賣
莊宅准例房親隣人合得承當若是親人不要及著價
不及方得別處商量不得虛抬價例蒙昧公私有發覺
已任親人論理勘責不虛業主牙保人並行重斷仍改

正物業或親鄰人不收買妄有遮恠阻滯交易者亦當深罪從之

城郭

後唐天成元年四月勅京都之內右無郡城本朝多事已來諸侯握兵自保張全義土功斯設李罕之砦地猶存時以廓清固宜除剗若特差夫役又恐擾人宜令河南府先分擘出舊日街巷其城壕許占射平填便任蓋屋宇其城基內舊有巷道處便為巷道不得徇情妄有

侵射仍請射後限一月如無力平剗許有力人戶占射
平填

周廣順二年正月詔開封府修補京師羅城率畿內丁
夫五萬五千版築旬日而罷

顯德二年四月詔曰惟王建國實曰京師度地居民固
有前則東京車馬輻輳水陸會通時向隆平日增繁盛
而都城因舊制度未恢諸衛軍營或多窄狹百司公署
無處興修加以坊市之中邸店有限工商外至億兆無

窮餽貸之資增添不定貧乏之戶供辦實難而又屋宇
交連街衢湫隘入夏有暑濕之苦居常多煙火之憂將
便公私須廣都邑宜令所司於京城四面別築羅城先
立標識候將來冬末春初農務開時即量差近甸人夫
漸次修築春作纔動便令放散或土功未畢即次年修
築今後凡有營壘及興窑竈并草市並須立標識七里
外其標識內候官中擘畫定軍營街巷倉場諸司公廨
院務了即任百姓營造至三年正月發畿內及滑曹鄭

之丁夫十餘萬築新羅城仍使曹州節度使韓通充部
署大使

館驛

晉天福五年九月改東京上源驛為都亭驛

周廣順二年十二月勅諸道所差知館驛人不得於州
縣別差人戶貼助致擾貧民

顯德四年四月改赤倉驛為通吳驛

初世宗始議圖南
命於赤倉置驛至

是以其名識之

五年五月以城東新驛為懷信驛

待江南
二使也

鹽

後唐同光三年二月勅魏府每年所徵隨絲鹽錢每兩與減放五文逐年俵賣蠶鹽食鹽夫鹽甜次冷鹽每斗與減五十釐鹽與減三十

天成元年四月勅諸州府百姓合散蠶鹽今後每年抵二月內一度俵散依夏稅限納錢

晉天福元年十一月赦節文洛京管內逐年所配人戶食鹽起來年每斗減放十文七年十一月宣旨下三

司應有往來鹽貨悉稅之過稅每斤七文住稅每斤十文其諸道應有係屬州府鹽務並令省司差人勾當先是諸州府除俵散鹽徵錢外每年米鹽界分場務約糶錢一十七萬貫有餘言事者稱雖得此錢百姓多犯鹽法請將上件食鹽錢於諸道州府計戶每戶一貫至二百為五等配之然後任人逐便興販既不虧官又益百姓朝廷行之諸處場務且仍舊俄而鹽貨頓賤去出鹽諸處州縣每斤不過二十掌事者又稱驟改其法奏

請重置稅焉蓋欲絕興販歸利於官場院糶鹽雖多人戶鹽錢又不放免民甚苦之

周廣順二年三月勅青白池務素有定規祇自近年頗乖循守北來青鹽一石抽稅錢八百鹽一斗白鹽一石抽稅錢五百鹽五升訪聞改法已來不便商販宜令慶州權鹽務今後每青鹽一石依舊抽稅八百八十五陌鹽一斗白鹽一石抽稅錢五百八十五陌鹽五升此外更不得別有邀求青白鹽池在鹽州北唐朝元營四池

曰烏池白池瓦窑池紐頂池今出稅置吏惟有青白二池 三年二月勅諸州府并外縣鎮城內其居人屋稅鹽今後不俵其鹽錢亦不徵納所有鄉村人戶合請蠶鹽所在州縣城鎮嚴切檢校不得放入城門

顯德元年十二月上謂侍臣曰朕覽食末鹽州郡犯私鹽多於顆鹽界分蓋卑濕之地易於刮鹹煎造豈惟違我權法兼又污我好鹽况末鹽煎煉搬運費用倍於顆鹽今宜分割十餘州令食顆鹽不唯輦運省力兼又少

人犯禁自是曹宋已西十餘州皆食顆鹽 三年十月

勅漳河以北州府管界 是官場糶鹽今後除城郭草

市內仍舊禁法其鄉村並不鹽貨通商逐處有鹽酒之

地一任人戶煎煉興販但不得踰越漳河入不過商界

麴

梁開平三年十一月勅聽諸道州府百姓自造麴官中

不禁

後唐天成三年七月十三日勅應三京鄴都諸道州府

鄉村人戶自今年七月後於夏秋田苗上畝納麴錢五文足陌一任百姓造麴醞酒供家其錢隨夏秋徵納並不折色其京都及諸道州府縣鎮坊界及關城草市內應逐年買官麴酒戶便許自造麴醞酒貨賣仍取天成二年正月至年終一年逐戶計筭都買麴錢數內十分祇納二分以充權酒錢便從今年七月後管數徵納權酒戶外餘諸色人亦許私造酒麴供家即不得衷私賣酒如有故違便仰糾察勒依中等酒戶納權其村坊一

任估賣不在納權之限其麴勅命到後任便踏造如賣麴酒戶中有去年曾買官麴今年因事不便買麴任開店者則與出落如觀新勅有情愿開店投權者則不計舊戶新戶便令依見納錢等戶例出權此估酒戶中有無力開店賣酒者亦許隨處陳狀其舊納錢並宜停廢應諸處亦仰十分減八分價錢出賣不得更請官本踏造

長興二年三月勅節文諸道州府人戶每秋苗一畝上

元徵麴錢五文今後特放二

一作三

文仍徵三

一作二

文

勅應三京諸道州府苗畝上所徵麴錢便從今年夏並放其麴官中自造委逐州減舊價一半於在城撲斷貨賣除在城居人不得私造外鄉村人戶或要供家一任自造勅既下人甚便之其年七月三司奏諸道州府申論先有勅命許百姓造麴不來官場收買伏慮課額不追請准前麴法百姓與在城條法一例指揮從之仍據百姓已造到麴務令送納入官量支還麥本

周顯德四年七月勅諸道州府麴務今後往例官中禁
法賣麴逐處先置都務處候到日並仰停罷據見在麴
數准備貨賣兼據年計合使麴數依時踏造候人戶將
到價錢據數給麴不得賒賣抑配與人其外場酒務一
切仍舊應鄉村人戶今後並許自造米醋及賣糟造醋
供食仍許於本州縣界就精美處沽賣其酒麴條法依
舊施行

先是晉漢已來諸道州府皆推計麴額置都務
以沽酒民間酒醋皆漓薄上知其弊故命改法

鐵

後唐長興二年十二月勅今後不計農器燒器動使諸物並許百姓遂便自鑄造諸道監治除當年定數鑄辦供軍熟鐵并器物外祇管出生鐵比已前價各隨逐處現定高低每斤一例減十文貨賣雜使熟鐵亦任百姓自煉巡檢節級勾當賣鐵場官并鋪戶一切並廢鄉村百姓祇於係省夏秋苗畝內納農器錢一文五分足隨夏秋稅二時送納

晉天福六年八月勅節文諸道鐵冶三司先條流百姓

農具破者須於官場中賣鑄時却於官場中買鐵今後並許百姓取便鑄造買賣所在場院不得禁止攪擾

鹽鐵雜條上

後唐長興四年五月七日諸道鹽鐵轉運使奏諸道州府鹽法條流元末大槩定奪謹具如後一應食顆鹽州府省司各置權糶折博場院應是鄉村並通私商興販所有折博每年人戶蠶鹽並不許挾帶一斤一兩入城侵奪權糶課利如違犯者一兩以上至一斤賣買人各

杖六十一斤以上至三斤買賣人各杖七十三斤以上至五斤買賣人各杖八十五斤以上至十斤買賣人各杖三年十斤以上不計多少買賣人各決脊杖二十處死所有犯鹽人隨行錢騾畜等並納入官所有元本家業莊田如是全家逃走者即行點納仍許搬載腳戶經過店主并御下人力等糾告等第支與優給如知情不告與賣鹽人同罪其犯鹽人經過處地分門司廂界巡檢節級所由并諸色關連人等不專覺察委本州臨特斷

訖散省如是門司關津口鋪捉獲私鹽即依下項等第
支給一半賣錢十斤以上至五十斤支賞錢二十千五
十斤以上至一百斤支賞錢三十千一百斤以上支賞
錢五十千應食末鹽地界州府縣鎮所有權糶場院人
內外禁法即末鹽一概條流應刮鹹煎鹹不計多少斤
兩並處極法并許四鄰及諸色人等陳告等第支給賞
錢欲指揮此後犯一兩以上至一斤買賣人各杖六十
一斤以上至二斤買賣人各杖七十二斤以上至三斤

買賣人各徒一年三斤以上至五斤買賣人各徒二年五斤以上買賣人各決脊杖處死如是收到鹹土鹽水即委本處煎煉鹽數准條科斷或有已曾違犯不至死刑經斷後公然不懼條流再犯者不計斤兩多少所犯人並處極法其權糶場院員寮節級人力煎鹹池各竈戶搬鹽舡網押網軍將衙官梢工等具知鹽法如有公然偷盜官鹽或將貨賣其買賣人及過鹽主人知情不告並依前項刮鹹例五斤以上處死其諸色關連人等首告

支賞錢即准洛京邢鎮條流事例指揮顆末青白等鹽
元不許界分叅雜其顆鹽先許通商之時指揮不得將
帶入末鹽地界如有違犯一斤一兩並處極法所隨行
物色除鹽外一半納官一半與捉事充賞其餘鹽色未
有畫一條流其洛京并鎮定邢州管內多有北京末鹽
入界捉獲并依洛京條流科斷欲指揮此後但是顆末
青白諸色鹽侵界叅雜捉獲並准洛京條流施行慶
州青白權稅院元有透稅條流所有隨行鹽物色一半

祇與捉事人充賞其餘一半并鹽並納入官欲並且依舊一斗以上至三斗杖七十三斗以上至五斗徒一年五斗以上處死安色解縣兩池權鹽院河中節度使兼判之時申到畫一事件條流等准勅牒兩地所出鹽舊日若無文榜如擅將一斤八兩准元勅條並處極法其犯鹽人應有錢物並與捉事人充賞者切以兩池禁棘峻阻不通行人四面各置場門弓射分擘鹽池地分居住並在棘圍裡面更不別有差遣祇令巡護鹽池如此

後有人偷盜官鹽一斤一兩出池其犯鹽人並准元勅
條流處分應有隨行錢物並納入官其捉事人依下項
定支授給若是巡檢弓射池塲門子自不專切巡察致
有透漏到棘圍外被別人捉獲及有糾告無同行反告
官中更不坐罪陳告人亦依捉事人支賞應有知情偷
盜官鹽之人亦依犯鹽人一例處斷其不知情關連人
臨時酌情定罪所有透漏地分官射及池塲門子如是
透漏出鹽二十斤以下徒一年半十斤以上至二十斤

支賞錢二十千二十斤以上至五十斤支賞錢二十千
五十斤以上至一百斤支賞錢三十千一百斤以上支
賞錢五十千前項所定奪到鹽法條流其應屬州
府捉獲抵犯之人便委本府州檢條流科斷訖申奏
別報省司其屬省院捉到犯鹽之人干死刑者即勘
情罪由犯上候省司指揮不至極刑者便委務司准
條流決放訖申報從之

五代會要卷二十六

欽定四庫全書

史部

五代會要卷二十七至三十

詳校官起居注主事

臣顧宗泰

編修

臣

程嘉謨覆勘

總校官編修

臣

王燕緒

校對官中書

臣

高中

謄錄監生

臣

黃鵠

欽定四庫全書

五代會要卷二十七

鹽鐵雜條下

宋 王溥 撰

周廣順二年九月十八日勅條流禁私鹽麴法如後
一諸色犯鹽麴所犯一斤以下至一兩杖八十配役五
斤以下一斤以上徒三年配役五斤以上並決重杖一
頓處死 一應所犯鹽麴關津門司廂巡門如有透漏

並行勘斷 一刮醺煎煉私鹽所犯一斤以下徒三年
配役一斤以上並法重杖一頓處死犯私鹽若捉到醺
水祇煎成鹽秤掣定罪逐處凡醺鹵之地所在官吏節
級所由常須巡檢村坊隣保遞相覺察若有所犯處彰
露並行勘斷 一所犯私鹽捉事告事人各賚賞錢以
係省錢充至死刑者賞五十千不及死刑者三十千
一顆末鹽各有界分若將本地分鹽侵越疆界同諸色
犯鹽例科斷 一鄉村人戶所請蠶鹽祇得將歸裏鹵

供食不得別將轉易貨賣投托與人如違並同諸色犯
鹽例科斷若是所請蠶鹽道路津濟經過州府縣鎮委
三司明行指揮 一凡買鹽麴並須于官場務內買若
衷私投托興販其買賣人並同諸色犯鹽麴例 一諸
官場官務如有羨餘出剩鹽麴盡底到官如衷私貨
買者買賣人並同諸色人犯鹽麴科斷若鹽鋪酒店戶
及諸色人與場院私衷貨者並同罪斷 一所犯私鹽
麴有同情共犯者若是骨肉卑幼奴婢同犯祇家長主

首如家長主首不知情祇罪造意者餘減等科斷若是

他人同犯並同情科斷遣

若與他人同犯據遂人脚下所犯斤兩依輕重斷遣

一州縣城鎮郭下人戶係屋稅合請鹽者若是州府並

於城內請給若是外縣郭鎮下人戶亦許將鹽歸家供

食仰本縣預取逐戶合請鹽數目攢定文帳部領人戶

給勒本處官吏及所在場務同點檢入城若縣鎮郭下人

戶城外別有莊田亦仰本縣預前分擘開坐勿令一處

分給供使 一應諸道今後若捉獲犯私鹽麴人罪犯

分明正該條法便仰斷遣訖奏若稍涉疑誤祇須申奏
取裁

顯德三年八月二十四日宣頭節文改立鹽法如後

一瞻國軍堂場務邢洺州鹽務應有見垛貯鹽貨處并
煎鹽煬灶及應是鹺地並須四面修置牆塹如是地里遙遠難為
修置牆塹即作濠籬規隔內偷盜夾帶官鹽無於濠籬外煎
造鹽貨便仰收捉及許諸色人陳告所犯不計多少斤兩並決
重杖一頓處死其經歷地方及門引節級人員並當量

罪酌斷所有捉事告事人賞錢二十千一斤以上至十斤賞錢二十千一十斤以上賞錢五十千一應有不係官鹽處醺地並須標識委本州府差公幹職員與巡鹽節級村保地主隣人同共巡檢若諸色偷刮醺地便即收捉及許人陳告若勘逐不虛捉事人每獲一人賞絹一十匹獲二人賞絹二十匹獲三人以上不計人數賞絹五十匹刮醺煎鹽人并知情人所犯不計多少斤兩並決重杖一頓處死其刮醺處地分并刮醺人住處

巡檢節級所由村保各徒二年半令衆一月依衆勾當
刮鹵處地主不切檢校徒二年令衆一月一顆鹽地
分界內有人刮鹵煎煉貨鹽並依前法一今緣改價
賣鹽慮有別界分鹽貨遞相侵犯及將鹽入城諸色犯鹽
人今下一司依下項條目科斷其犯鹽人隨行物色給與
本家其鹽沒入官所經歷地分節級人員並行勘斷一兩
至一斤決脊杖五十令衆半月捉事告事人賞錢五千一
斤以上至一十斤徒一年半令衆一月捉事告事人賞錢七

千十斤以上不計多少徒二年配發運務役一年捉事告事

人賞錢七千

別本作十千

一諸州人戶所請蠶鹽不得於鄉

村裏貨賣及信團頭腳戶縣司請鹽節級所由等剋折糶賣如有犯者依諸色犯鹽例科斷一如有人於河東界將鹽過來自家界內有人往彼興販鹽貨所犯者並處斬其犯鹽人隨行驢畜資財並與捉事人充賞

漕運

後唐同光三年閏十一月吏部尚書李琪上疏曰臣伏

思漢文帝時欲人務農及募人入粟得拜爵及贖罪景
帝亦如之後漢安帝時水旱不足三公奏請富人入粟
得封關內侯及公卿以下散官本朝乾元中亦曾如此
今陛下縱不欲入粟授官願降明勅下諸道合差百姓
轉搬之處有能出力運官物到官者五百石以上白身
授一初任州縣官有官者依資次遷授次遷者便與放
選千石以上至萬石者不拘文武顯是賞酬免令方春
農人流散此亦轉倉贍軍之一術也勅李琪所論召募

轉倉斛斗與官行賞委租庸司下諸州府有應募者奏聞施行

長興二年五月三日勅應沿河船般倉依北面轉運司船般倉例每一石于數內與之銷破二升 四年三月三日三司奏洛河水運自洛口至京往來牽船下卸皆是水運牙官每人管定四十石今洛岸至倉門稍遠牙官運轉維艱近日例多逃走今欲於沿河北岸別鑿一灣引船直至倉門下卸其工欲於諸軍僦人內差借從

之尋命捧聖衛指揮使朱洪實鑿開河灣至贍國倉門
周顯德二年正月上謂侍臣曰轉輸之物向來皆給斗
耗自漢已來不與支破倉廩所納新物尚破省耗况水
路所搬豈無損失今之後每石宜與耗一斗 四年四
月詔疏下汴水一派北入於五丈河又東北達於濟自
是齊魯之舟楫皆至京師 六年二月命侍衛馬軍指
揮使韓令坤自京東流下汴水入于蔡河命侍衛步軍
都指揮使袁彥浚五丈河以通漕運

倉

梁開平四年五月勅補開封府及河南北倉吏非舊典也

後唐天成二年六月二十九日戶部奏先准天成元年五月十五日勅檢納夏秋苗子斛斗一斗祇納一斗官中納不收耗人戶送納之時如有使官布袋者每一布袋使百姓納錢八文內五文與擎布袋人餘三文即與倉司充吃食鋪襯紙筆盤纏若是人戶出布袋祇令納三文與

倉司

長興二年閏五月三日勅諸道州府所納兩稅斛斗今後每斗上納加耗二合准備倉司耗折其收到布袋錢仰官典同共繫署一一分明上歷支緡

晉天福八年五月十五日三司奏天下今後諸倉請據人戶元納耗二升內一升依舊送納本色充備單雀耗折一升即令人戶送納價錢兩文足與元納錢八文足共一十文足充備倉司斗袋人夫及諸色吃食紙筆鋪

襯盤纏支費從之

周廣順元年正月勅節文其諸道州府倉場庫務宜令節度使刺史專切鈐轄掌納官吏一依省條指揮不得納斗餘秤耗舊來所進羨餘物今後一切停罷

疏鑿利人

周顯德五年十一月以尚書司勳郎中何幼冲為關西渠堰使命於雍耀二州界疏涇水以溉田

閉糶

後唐同光三年閏十二月十九日勅今歲自春以來水
澇為患物價騰湧人戶多於西京收糶斛斗近聞京西諸
道州府逐道皆有稅錢遂不通行乃同閉糶宜令宣下
京西諸道州府凡閉糶斛斗不得輒有稅率及經過水
陸門坊鎮縣妄有邀難

周廣順元年四月勅天災流行分野代有苟或閉糶豈
是愛人宜令沿淮渡口鎮浦不得指淮南人糶易 三
年七月勅沿淮諸州點檢淮南人所糶量倉如是以驢

驛為馱及負擔過即放過不得以舟車輦運過淮先是淮南大旱井泉竭太祖愍之命許博糴至是聞吳人收糴入官以備軍倉詔止輦運過者

泉貨

後唐同光二年三月勅泉布之弊雜以鉛錫惟是江湖之外盜鑄尤多市肆之間公行無畏因是網商夾帶舟載往來換易好錢藏貯富室實為蠹弊須有條法宜令京城及諸道行市行使錢內點檢雜惡鉛錫並宜禁斷

沿江州縣每有舟船到岸嚴加覺察若私載往來並宜
收納

天成年中書門下奏訪聞近日諸道州府所買賣銅
器價貴多是銷鎔現錢以邀厚利勅宜徧行曉告如原
舊破損銅器及碎銅即許鑄造器物如生銅器物每斤
價定二百熟銅器物每斤四百如違價買賣之人依
盜鑄錢律文科斷 其年十一月六日勅諸道州府約
勒見錢素有條制若全禁斷實匪通規宜令遍指揮三

司及諸道州府其諸城門所出見錢如五百以上不得放出如稍違犯即准舊條指揮其沿淮諸州縣鎮亦准元降勅命處分 其年十二月勅行使銅錢之內訪聞夾帶鐵鑠若不嚴設條法轉恐私家鑄造應中外所使銅錢內鐵鑠錢即宜毀棄不得輒有行用如違其所使錢不計多少並納入官仍科深罪 二年七月十三日度支奏三京鄴都並諸道州府市肆買賣所使見錢等每有條章每陌八十文近訪聞在京及諸道街坊市肆人戶

不顧條章皆將短陌轉換長錢但恐欺罔殊無畏忌若不條約轉啟倖門請更嚴降指揮及榜示管界州府鎮縣軍人百姓商旅等凡有買賣並須使八十陌錢兼令巡司廂界節級所由點檢覺察如有無知之輩依前故違輒將短錢興販便即收捉委逐州府枷項收禁勘責所犯人准條奏處斷訖申奏其錢盡底沒納入官奉勅宜依度支所奏 四年九月勅先條上三京諸道州府不得於市使錢內夾帶鉛鐵錢雖已約束仍聞公然行

使今後有人於錢陌內捉到一文至兩文所使錢不計多少納官所犯准條流科罪

清泰二年十二月勅御史臺宜曉告中外不得使用鉛錢如違犯者准條法處分

晉天福三年三月勅歷代鑄錢濟時為寶義無監務已絕增添近來趨利之人違法甚衆銷鎔不已毀蠹日滋禁制未嚴奸弊莫止須行重法以息濫源宜令鹽鐵使禁止私下行造鑄銅器其年十二月詔曰國家所資

泉貨為重銷蠹則甚添鑄無聞爰降條章俾臻富庶
宜令三京鄴都諸道州府無問公私應有銅者並許鑄
錢仍以天福元寶為文左環讀之委鹽鐵司鑄樣頒下
諸道令每一錢重二銖四釐三十錢重一兩或慮諸色人
接便將鉛鐵鑄造雜亂銅錢仍令三京鄴都諸道州府
依舊禁斷尚慮逐處銅數不多宜令諸道應有久廢銅
冶處許百姓取便開鍊永遠為主官中不取課利其有
生熟銅仍許所在中賣入官或任自鑄錢行用其餘許

鑄錢外不得輒便別鑄銅器如有違犯者並准三年三月勅條處分 其年十二月勅先許鑄錢仍每一錢重二銖四釐三十錢重一兩竊慮逐處缺銅難依先定錢兩宜令天下無問公私應有銅處欲鑄錢者一任取便酌量輕重鑄造因茲不得入鉛并鐵及缺漏不堪久遠流行仍委鹽鐵使明行曉示餘准元勅指揮仍付所司四年七月勅先令天下州府公私鑄錢近聞以鉛錫相參缺薄小弱有違條制不可久行今後祇官鑄錢私

下禁舊法

周廣順元年三月二十八日勅銅法今官中更不禁斷
一任興販所有錢一色即不得銷鑄為銅器貨賣如有
犯者有人糾告捉獲所犯人不計多少斤兩並處死其地
分所由節級徒一年鄰保人杖七十其告事人給與賞
錢一百貫

顯德二年九月一日勅國家之利泉貨為先近朝已來
久絕鑄造至於私下不禁銷鎔歲月漸深奸弊尤甚今

採銅興冶立監鑄錢冀便公私宜行條制起今後除朝廷法物軍器官物及鏡并寺觀內鐘磬鈸相輪火珠鈴鐸外其餘銅器一切禁斷應兩京諸道州府銅象器物諸色裝鉸所用銅限勅到五十日內並須毀廢送官其私下所納利銅據斤兩給付價錢如出限及有隱藏及埋窖使用者一兩至一斤所犯人及知情人徒二年所由節級四隣杖七十捉事告事人賞錢十貫一斤至五斤所犯及知情人各徒三年所由節級四隣杖九十捉

事告事人賞錢二十貫五斤以上不計多少所犯人處
死知情人徒二年配役一年所由節級四隣杖一百捉
事告事人賞錢三十貫其人戶若納到熟銅每斤官中
給錢一百五十生銅每斤一百其銅鏡令官中鑄造于
東京置場貨賣許人收買于諸處興販其朝廷及諸州
見管法物軍器官物舊用銅製造并裝飾者候經使用
破壞即時改造仍今後不得更使銅內有合使銅者奏
取進止 四年六月十一日宣命指揮限外有人將銅

器及銅於官場貨賣支給價錢如使隱藏及使用者並
准元勅科斷其熟銅令每斤添及二百生銅添及一百
五十收買所有諸處山場野務採鍊淘沙依舊例銅每
二十兩為一斤今時每一十六兩為一斤給錢一百二
十收買兼知高麗多有銅貨仍許青登萊州人戶興販
如有將來中賣入官者便仰給錢收買即不得私下買
賣

諸色料錢上

梁開平三年正月詔曰祿俸所以養賢而勵奉公也朕
今肇建諸色已異郊裡職貢至多置用差少其百官俸
料委左藏庫依例全給

後唐同光三年二月十九日租庸院奏新定四京及諸
道副使判官已不俸料請降勅各下逐處支遣兼除所
置副使判官掌書記推官外如本處更妄稱簡署官員
即勒本道節度使自備請給不得正破係省錢物

諸道藩鎮請祇置節度使副節度觀察判官掌書記推

官共五員

節度使副料錢每月四十千依除實數錢厨料米一石
麪二石內價錢三千蒿六十束柴三十束春服絹十五
疋冬服絹一十五疋綿三十兩私馬二匹草料

節度觀察判官料錢每月三十千依除實錢厨料米六
斗麪一石六斗價錢二千蒿四十束柴二十束春服絹一
十二疋冬服絹一十二疋綿二十五兩私馬一匹草料
節度掌書記料錢每月二十五千依除實錢厨料米六

斗麴一石二斗內價錢一千五百蒿三十束柴一十五束春服絹一十足冬服絹一十足綿二十兩私馬一匹草料

節度推官料錢每月一十五千依除寶錢厨料米六斗麴一石二斗內價錢一千五百蒿三十束柴一十五束春服絹一十足冬服絹一十足綿二十兩私馬一匹草料

留州兼判六軍請置副使判官推官三員副使依節度

副使例判官依觀察判官例推官依諸道推官例留守
不判六軍請置判官推官二員

判官依節度觀察判官例推官依諸道推官例四京府
請祇置推官一員如已有判官即不置判官其請受准
留守推官例其料錢准百官例折支所有厨料時服等
即給本色右奉勅宜令諸道節鎮依舊更置觀察支使一
員其俸料春衣賜仍准掌書記例支遣餘依租庸院所
奏



五代會要卷二十七

欽定四庫全書

五代會要卷二十八

宋 王溥 撰

諸色料錢下

後唐同光三年二月十五日租庸院奏諸道州縣官并防禦團練副使判官等俸料各據逐處具到事例文帳內點檢舊來支遣則例錢數不等所請折支物色又加錢數不定難為勘會今除東京管內州縣官見支折支

課錢且依舊外其三京并諸州於舊日支遣錢數等第
重定則例兼切循本朝事體防禦團練副使判官外其
餘推巡以下職員皆是本處自要辟請圓融月俸贍給
亦乞依舊規繩省司更不支給錢物謹具如後

防禦團練副使判官副使逐月料錢三十千貫判官逐
月二十千貫

刺史州元無副使有者請廢其軍事判官所有月俸亦
是刺史已俸內支贍

三京少尹支料錢逐月三十千貫赤縣令每月正受支料錢二十五千貫考滿并攝比正官支一半主簿每月正授支料錢一十二貫考滿并攝比正官支一半

畿縣令每月正授支料錢二十千貫考滿并攝比正官支一半主簿每月支料錢一十千貫考滿并攝比正官支一半

司錄參軍每月正授支料錢三十千貫考滿并差攝比正官支一半

諸曹判司官每月正授支料錢一十二千貫考滿并差攝比正官支一半

文學每月正授支料錢五千貫考滿并差攝比正官支一半

參軍每月正授支料錢五千貫考滿并差攝比正官支一半諸州府錄事參軍各依逐州上縣令支州判司各依上縣主簿支

一萬戶以上縣令每月正授支料錢二十三千貫考滿

并差攝比正官支一半主簿每月正授支料錢一十三千五百貫考滿并差攝比正官支一半

九千戶以上縣令每月正授支料錢二十二千貫考滿并差攝比正官支一半主簿每月正授支料錢一十二千貫考滿并差攝比正官支一半

八千戶以上縣令每月正授支二十一千貫考滿并差攝比正官支一半主簿每月正授支一十一千五百貫考滿并差攝比正官支一半

七千戶以上縣令每月正授支二十千貫考滿并差攝
比正官支一半主簿每月正授支一十一千貫考滿并
差攝比正官支一半

六千戶以上縣令每月正授支一十九千貫考滿并差
攝比正官支一半主簿每月正授支一千五貫考滿并
差攝比正官支一半

五千戶以上縣令每月正授支一十八千貫考滿并差
攝比正官支一半主簿每月正授支一十千貫考滿并

差攝比正官支一半

四千戶以上縣令每月正授支一十七千貫考滿并差
攝比正官支一半主簿每月支九千五百貫考滿并差
攝比正官支一半

三千戶以上縣令每月正授支一十六千貫考滿并差
攝比正官支一半主簿每月正授支九千貫考滿并差
攝比正官支一半

二千五百戶以上縣令每月正授支一十五千貫考滿

并差攝比正官支一半主簿每月正授支八千五百貫
考滿并差攝比正官支一半

二千戶以上縣令每月正授支一十四千貫考滿并差
攝比正官支一半主簿每月正授支八千貫考滿并差
攝比正官支一半

一千五百戶以上縣令每月正授支一十三千貫考滿
并差攝比正官支一半主簿每月正授支七千五百貫
考滿并差攝比正官支一半

一千戶以上縣令每月正授支一十二千貫考滿并差攝比正官支一半主簿每月正授支七千貫考滿并差攝比正官支一半

五百戶以上縣令每月正授支一十一千貫考滿并差攝比正官支一半主簿每月正授支六千五百貫考滿并差攝比正官支一半

五百戶以下縣令每月正授支一十千貫考滿并差攝比正官支一半主簿每月正授支六千貫考滿并差攝

比正官支一半

右租庸使奏重定料錢州例如前如諸道舊有取用處今後不得占留開破並依百姓例輸稅奉勅宜依

長興二年閏五月起居郎曹琛奏文武兩班或請假歸寧或卧疾未頓才住班簿便住料錢伏乞特降勅命者勅今後文武官請准式歸寧給假及疾病者并許支給本官料錢 其月二十四日勅諸道行軍司馬副使判官以下賓寮等考滿未有替人宜令並全支俸料元不在

省司給俸者不在此例

清泰元年七月勅洋王從璋涇王從敏每月各給料錢一百千米麥各五十石僦人衣糧各五十分馬五十五

匹草粟

二王自方鎮入朝洛陽私第故有是給賜

二年十月將作監丞襲

封介國公宇文頡奏蒙恩襲封除官無襲爵俸給詔特給本官俸

晉天福六年二月勅諸衛上將軍逐月加俸錢二萬

漢乾祐三年七月十六日勅節文諸道州府令錄判官

主簿宜令等第支與俸戶逐戶每月納錢五百與除二
稅外免放諸雜差遣不得更種職所定俸戶於中等無
色役人戶內置不得差令當直及赴衙參如有闕額及
不逮明申州府差填不得衷私替換若是令錄判司主
簿除本分人數外剩占俸戶及令當直手力更納料錢
並許百姓陳告其陳告人與免戶下諸雜差徭所犯人
追毀告身更加力役如令佐錄事參軍內有員闕州府
差攝亦依例支與俸錢差攝曹官不得一例供破定例

如後 三千戶以上縣令逐月一十二千主簿六千

二千戶以上至三千戶以下縣令九千主簿五千 一

千戶以下縣令六千主簿四千 錄事叅軍判司依本

部內戶口取最多縣令例支破其錄事叅軍依奏縣令

例判司依主簿例

周廣順元年四月勅牧守之任委遇非輕分憂之務既
同制祿之數宜等自前有富庶之郡請給則優或邊遠
之州俸料素薄以至遷除之際擬議亦難既論資序之

高卑更患祿秩之升降宜分多益寡均利同思冀無黨
偏以勸勲效今重定則例諸州防禦使料錢二百千祿
粟百石食鹽五石馬十匹草粟元隨三十人衣糧團練
使料錢一百五十千祿粟七十石食鹽五石馬十匹草
粟元隨三十人衣糧刺史料錢一百千祿粟五十石食
鹽五石馬五匹草粟元隨二十人衣糧仍取今年五月
一日後到任者依前定例支其以前在任者所請如故
顯德五年十二月中書奏諸道州府縣官及軍事判官

一例逐月各據逐處主戶等第依下項則例所定料錢
及米麥等取顯德六年三月一日後起支其俸戶並停
廢

一萬戶以上縣令逐月料錢二十千米麥共五石主簿
料錢一十二千米麥共三石

七千戶以上縣令逐月料錢一十八千米麥共五石主
簿料錢一十千米麥共三石

五千戶以上縣令逐月料錢一十五千米麥共四石主

簿料錢八千米麥共三石

三千戶以上縣令逐月料錢一十二千米麥共四石主簿料錢七千米麥共三石

不滿三千戶縣令逐月料錢一十千米麥共三石主簿料錢六千米麥共二石

五萬戶以上州司錄事參軍及兩京司錄每月料錢二十千米麥共五石司戶司法每月料錢一十千米麥共三石

三萬戶以上州司錄事叅軍每月料錢一十八千米麥
共五石司戶司法每月料錢八千米麥共三石

一萬戶以上州司錄事叅軍每月料錢一十五千米麥
共四石司戶司法每月料錢七千米麥共三石

五千戶以上州司錄事叅軍每月料錢一十二千米麥
共四石司戶司法每月料錢六千米麥共二石

不滿五千戶州司錄事叅軍每月料錢一十千米麥共
三石司戶司法每月料錢五千米麥共三石

諸司軍事判官一例每月料錢一十千米麥共三石

右諸州府京百司內諸司州縣官課戶莊戶俸戶柴炭
紙筆戶等望令本州及檢田使臣依前項指揮勒歸州
縣候施行畢具戶數奉聞仍差本州判官精細點數後
差使臣覆視及有人論訴稱有漏落抵罪在本州判官
及干繫官與如今後更有人戶願充此等戶者便仰本
州勒死軍戶配本州牢城服役從之 六年十二月詔
諸道州府攝官起今後支給本所諸官俸錢之半

迴鶻

迴鶻本牙在天德西北娑陵水上距長安六千九百里
唐天寶中安祿山犯闕有助國討賊之功累朝尚主自
天驕會昌初其國為黠戛斯所侵部族擾亂乃移帳至天
德振武間又為石雄劉沔所襲破之後為幽州節度使
張仲武所攻餘衆西奔歸于吐蕃吐蕃處之甘州其後
時通中國世以中國為舅朝廷每賜書詔亦嘗以甥呼
之

梁乾化元年十一月遣都督周易言等入朝進貢太祖御朝元殿引對以易言為右監門衛大將軍同正弟畧麥之石論思並為左千牛衛將軍同正李屋珠安鹽上並為右千牛衛將軍同正仍以左監門衛上將軍楊治為左驍衛上將軍充押領迴鶻還番使通事舍人仇元通為判官厚錫繒帛押領歸國又賜其入朝僧凝盧宜季思宜延錢等紫衣

後唐同光二年四月其本國權知可汧仁美遣都督李

引釋迦副使田鐵林都監楊福安等共六十六人來貢
方物并獻善馬九匹莊宗召對於文明殿乃命司農卿
鄭質將作少監何延嗣持節冊仁美為英義可汗至其
年十一月仁美卒其弟狄銀嗣立遣都督安千想等來
貢狄銀卒呵咄欲立亦遣使來貢名馬

天成三年二月其權知可汗仁裕遣都督李阿山等一
百二十人入貢明宗召對於崇元殿賜物有差其年三
月命使冊仁裕為順化可汗四年又遣都督製撥等二

人來朝授製撥等懷化司戈遣令還

長興元年十二月遣使翟米思三十餘人進馬八十匹
玉一團四年七月復遣都督李末等三十人入朝進白
鶻一聯明宗召對於廣壽殿厚加錫賚仍命解放其鶻
清泰二年七月遣都督陳福海以下七十人進馬三百
六十匹玉二十團至八月勅迴鶻朝貢使密錄都陳福
海可懷化郎將副使達奚相溫可懷化司階監使屈密
錄阿撥可歸德司戈判官安均可懷化司戈

晉天福三年十月遣使都督李萬全等朝貢以萬全為
歸義大將軍監使常福德為順化將軍 四年三月又
遣都督拽里敦來朝兼貢方物其月命衛尉卿邢德昭
持節就冊為奉化可汗貢良馬一百匹并白玉團白玉
鞍轡等謝其封冊

漢乾祐元年五月遣使李屋等入朝貢物并白玉藥物
等七月以入朝使李屋為歸德大將軍副使安鐵山監
使未相溫並為歸德將軍判官翟毛歌為懷化將軍

周廣順元年正月遣使并摩尼貢玉七十七團白氍毹
犂牛尾藥等物先是晉漢以來迴鶻每至京師禁民勿
私相易其所有寶貨皆中賣入官私下市易者罪之至
是太祖命除去舊法每迴鶻來者私下交易官中更不
禁詰由是玉之價直十損八七

顯德六年二月又遣使朝貢獻玉并礪砂等物皆不納
所入馬量給價錢時上以玉雖寶珍無益國用故因而
却之

吐渾

吐渾本吐谷渾也唐咸通中其長有赫連鐸者從太原
節度使康承訓平徐方有功朝廷授振武節度使復
盜據雲中後唐太祖逐之乃歸幽州李匡儔其部族散
居蔚州界立為部長其民不常有白承福者自同光初代
為都督依中山地石門為柵莊宗賜其額為寧朔奉化
兩府以都督為節度使仍賜承福姓李名紹魯其畜牧
就善水草丁壯常數千人羊馬生息入市中土朝廷常

存恤之

後唐天成三年二月其都督李紹魯等遣使進馬一百
二十匹明宗嘉之賜紹魯竭忠建策興復功臣金紫光
祿大夫檢校太保至四年八月其首領念公山來朝貢
其年十月別部首領薛冀堆進狀乞授嵐州刺史明宗
在藩時常與冀堆有舊欲許之樞密使安重誨力諫乃
止至長興元年三月竟以冀堆為嵐州刺史仍賜名萬

通

清泰三年五月以寧朔奉化兩府留後白可久起授檢校司徒副使赫連海龍檢校尚書左僕射兩府大夫李鐵匱檢校尚書右僕射

晉天福元年高祖以契丹冊立之功割雁門以北及幽州之地以賂之繇是吐渾部族皆隸於契丹其後苦契丹之虐政部族皆怨之後為鎮州節度安重榮所誘乃背契丹率車帳羊馬取其臺路歸國契丹大怒以朝廷招納叛亡遣使責讓六年正月晉高祖命供奉官張澄

各率兵二千搜索并鎮忻代四州山谷吐渾還其舊地
然亦以契丹誅求無厭心不平之命漢高祖出鎮太原
潛加慰撫其年五月其大首領白承福及麾里念虎里
赫連功經等來朝九月又遣首領白可久來朝少主嗣
位絕契丹之好數召其部長入朝厚加錫每大讌會皆
命列賜坐於勛臣之次至開運中捍敵於澶州召承福
等率其部衆從行屬歲多暑熱部下多死復遣歸太原
移帳於嵐石州界然承福馭下無法多干軍令其族子以

白可久名在承福之亞因牧馬率本帳北遁契丹授以
官爵復遣潛誘承福承福亦思叛去事未果漢祖知之
乃以兵環其部族擒承福與族白鐵匱赫連海龍等五
家共四百餘人伏誅籍其牛馬命別部長王義宗統其
餘屬

奚

奚本匈奴別種即東徼之地人物風俗與突厥同族有
五姓一曰約羅部管縣六二曰伯特部管縣四三曰敖

拉部管縣六四曰美嘉部管縣四五曰綽羅部所管縣
三每部有刺史每縣有令首長號奚王唐制兼饒樂府
都督居陰涼州東去營府五百里南去幽州九百里幽
州置饒樂府長史一人監之人馬約二萬後徙居琵琶
川在幽州東北數百里出古北口地宜羊馬羊則純墨
馬則前蹄堅善走以馳獵為務逐獸高山自下而上其
勢若飛語與契丹小異爨以平底瓦鼎煮糲為粥既飮
以寒水解之而食每春借邊民之荒田種糲秋熟方來持

獲畢則害於山下人莫知其處所以木為碓斷椽為臼
所受不過一斗自天祐初契丹兵力漸盛室韋奚霫皆
受制焉故奚之部族為契丹代守邊土甚慮其虐其首
領奇珠怨之以別部內附徙於媯州依北山而居漸至
數千帳故有東西奚之號奇珠卒其子薩剌代立後唐
莊宗破幽州賜薩剌姓李名紹威

後唐同光元年十二月遣使朝貢 三年九月以莊宗
誕節至遣使表貢方物

天成四年薩喇因剪爪傷乃卒其子蘇庫代立亦時遣使入朝

清泰三年七月其首領達爾罕遣都爾嘉奏其王蘇庫謀叛欲附契丹已處置訖權知部落廢帝降詔以慰撫之

晉天福元年高祖以契丹有助立之功割雁門以北及幽州之地以賂之繇是奚之部族復隸於契丹自後常為契丹之所役屬

開運三年十二月契丹犯闕其王伊喇以所部兵屯於
洛陽及虜主死隨衆北遁

五代會要卷二十八